

四庫全書

集部

欽定四庫全書

集部
宋藝圃集卷十八

詳校官中書臣陸 湘

總校官庶吉士臣 何思鈞

校對官編修臣 李堯棟

謄錄監生臣 毛 杞

欽定四庫全書

宋藝圃集卷十八

明 李蔡 編

曹緯二首

自齊山借舟泛湖還家

十里平湖漫不流
晚風吹浪打行舟
定知歸後侵燈火
家在荻蒲最盡頭

清溪亭

波平渺渺草淒淒遠目非昏望欲迷敢以安閒親白鳥
聊將衰病照清溪百年無事雙蓬鬢萬里歸心獨杖藜
徙倚無人見牢落水流東去夕陽西

曹組一首

夜歸曲

饑鳥啞啞啼暮寒回風急雪飄朱闌瑣窗繡閣艷紅獸
畫幕金泥搖彩鸞吳粧秀色攢眉綠能唱襄陽大堤曲
酒酣橫管咽孤吟吹裂柯亭傲霜竹遠空寒雪渾不動

老狐應渡黃河凍暗回微煖入江梅何處荒榛掛么鳳
歸來祇誇青連錢貂茸擁鼻行翩翩籠紗密炬照飛霰
十二玉樓人未眠

王十朋十首

福田院留建聖節

小院藏深竹柴門旁曲江繫舟楊柳岸詩句落僧窗

蘆花

蘆花兩岸風蕭瑟渺渺烟波浸秋日鷗鷺家深不見人

小舟忽自花中出

離荆南用夔州船

扁舟經月沂江流又向江陵換蜀舟
腸斷一聲離岸艣不堪回首仲宣樓

雪中

臥聞征鴈作回音遙想吾廬玉滿林
乘興扁舟定歸去草堂深處伴猿吟

臥龍山武侯新祠

山藏古寺栢青青地重端因蜀相登沙上不聞江轉石
人間幾見谷為陵龍蛇樹影搖千尺玉雪蒼枝吐萬層
堪嘆草廬誰復顧淒山香火却依僧

梁彭州歸自道山沂流入峽以二詩見寄因次其
韻

壯夫白首兩同年又繼錢塘唱和篇十載音書天上鴈
一江風雨峽中船西州賢守得高適東觀人才推孟堅
紫陌曾陪探花馬姓名深愧在廬前

元日

元日年年見天涯意故長詩章示宗武春色酌瞿唐白
髮又新歲黃柑非故鄉弟兄團拜處歸去願成行

宿灌口

拂曉出楚塞中流望荆門江隨銅柱轉舟遇虎牙奔鳥
度暮天濶魚翻秋水渾宜都轉盼近夜宿舊江村

泊桐廬分水港

何處繫歸舟桐廬舊日遊港從分水出亭瞰合江流疊

嶂雲披絮遙天月吐鉤紛紛釣魚者無復見羊裘

次韻馮元仲正字湖上有作

甌蜀異鄉客西湖同日看浪花隨去棹風絮逐歸鞍水
浸吳天濶山涵佛界寬春光無限好只愧縛微官

張表臣一首

高郵寺壁曹仁熙畫水

曹生畫手信有神毫端風雨生
奔湍波濤不合來翻屋
蛟鰐何須欲噬人
湯湯此水勢方割
陽侯鬱怒馮夷搏

鼉擲鯨吐海嶽驚霧塞雲昏光景薄開元將軍愛驍
拳奇滅沒隘九州時危此物豈易得寫此尚可銷人憂
未有乃孫能畫水逋客見之喜欲死雷奔電擊走中原
魚怖龍愁寧忍視先生道眼高崑崙聊將妙語破迷津
中流險絕待舟楫四海浩蕩煩經綸我衰甘作淮海客
身脫垂涎頭雪白驚心未定畏湍湍欲覓平波泛家宅
此身端的老江湖雨笠烟蓑是所圖他年但飽揚州米
今日寧論覽社珠

王觀二首

遊俠曲

雪擁燕南道酒闌中夜行十里不見讐怒須如立釘出
門氣吹霧南山雞未啼腰間解下聶政刀袖中擲下朱
亥椎冷笑邯鄲乳口兒

莫惱翁篇

穀垂乾穗豆垂角雨足年登不勝樂烏巾紫領銀鬚長
白酒滿盃翁自酌翁醉不知秋色涼兒捋翁鬚孫撼牀

莫惱翁翁年已高百事慵

范成大八首

田園雜興

六首

紫青萸菜捲荷香玉雪芹芽坂薤長自擷溪毛充晚供
短蓬風雨宿橫塘

烏鳥投林過客稀前山烟暝到柴扉小童一棹舟如葉
獨自編欄鴨陣歸

菽粟瓶罌貯滿家天教將醉作生涯不知新酒堪窮未

今歲重陽有菊花

新霜徹曉報秋深
染盡青林作纈林
惟有橘園風景異
碧叢叢裏萬黃金

斜日低山片月高
睡餘行樂繞江郊
霜風掃盡千林葉
閒倚筇枝數鶴巢

探梅公子款柴門
枝北枝南總未春
忽見小桃紅似錦
却疑儂是武陵人

鄂州南樓

誰將玉笛弄中秋黃鶴飛來識舊游漢樹有情橫北渚
蜀江無語抱南樓燭天燈火三更市搖月旌旗萬里舟
却憶鱸鄉垂釣叟武昌魚好更淹留

夜步東寺之西

人家簾幕夜香飄燈火蕭疎照市橋滿院月明春意好
小樓吹笛近元宵

周必大一首

入直

綠槐夾道集昏鴉
勅使傳宣坐賜茶
歸到玉堂清不寐
月鉤初上紫薇花

曾極一首

蔡西山挽詩

四海朱夫子徵君獨典刑
青雲伯夷傳白日太玄經
有客憐孤憤無人問獨醒
瑤琴空寶匣絃斷不堪聽

郝子玉一首

七月十五夜顯仁寺東軒對月

野迥雲歸盡山高月上遲
暗螢依露草驚鵲遶風枝
素影隨波遠新涼與酒宜
中秋更有味試為卜歸期

路枕一首

秋懷

落日留虛壁秋風急戍樓
高歌鬼神夜揮涕虎狼秋
豪貴少青眼文章多白頭
何時掛長劒天地一扁舟

左緯一首

送別

騎馬出門三月暮
楊花無賴雪漫天
客情惟有夜難過
宿處先尋無杜鵑

趙彥端一首

壽皇太子

日日龍樓問寢時
雖人未動漏花遲
前星一點朝天節
只有清臺太史知

周昂六首

代書寄王元伯

南園鵲蟻記同傾一紙書來萬里情
日夜愁心隨柳色
東風吹滿大梁城

雪

小雪暮能繁愁雲久更昏
細燈寒出戶
敝樹老當軒
竹葉舊時釀梅花何處村
賦詩空入夜
愁絕與誰論

夜步

擊柝隣居淨開門宿鳥驚
西風秋半急
北斗夜深明
獨立乾坤大
徐行杖履輕
遙憐漢宮闕
重露濕金莖

翠屏口

野蔓稍拖架輕泥濺馬鞍徑斜來險石溪急上清灘羽
檄千山淨羔裘六月寒長松空夾道蕭颯不成看

晚陰不成雨

落日明西極高雲暗朔方樓臺分照耀宇宙一蒼茫不
借蛟龍便虛成燕雀忙何須遣雷怒鬱鬱繞高梁

莫州道中

大陵河東古莫州居人小屋如蝸牛屋邊向外何所有

唯見白沙纍纍堆山丘車行如倒拽風驚沙流失前轍
馬蹄半領穿三步停鞭五步歇雞聲人語無四鄰晚風
蕭蕭愁殺人人有禱沙應神遼東老兵非使臣何必埋
却雙車輪

李純甫一首

雪後

玉環暈月蟠長虹飛沙捲土號陰風黃雲幕幕翳晴空
屋頭唧唧鳴寒蟲天符夜下扶桑宮玄冥震怒鞭魚龍

魚龍飛出滄海底吐嗟如律愁神公急刺北斗捲雲漢
凌澌捲入天瓢中推璋碎六華剪出寒瓏瑤翩翩作穗
大如手十竒萬巧難形容恍如墮我銀沙界清光晞夜
寒腫臃肝腸作祟耿無寐試把往事閒追窮男兒生須
街枚捲甲臂琯弓徑投虎穴策竒功不然羊羔酒帳玻
璆鍾侍兒醉臉潮春紅誰能塞驢駝著灞陵東骨相酸
寒愁煞儂屏山正吐黃蘗氣笑倒坐間亡是公

宇文虛中三首

和高子文秋興

搖落山城暮樓遲客館幽葵衰前日雨菊老異鄉秋自
信浮沉數仍懷顧望愁蜀江歸棹在浩蕩逐春鷗

又和九日

老畏年光短愁隨秋色來一持旌節出五見菊花開強
忍玄猿淚聊浮綠蟻盃不堪南向望故國又叢臺

中秋覓酒

今夜家家月臨筵照綺樓那知孤館客獨抱故鄉愁感

激時難遇謳吟意未休應分千斛酒來洗百年憂

趙泚四首

元日

馬上逢元日東風送客愁
潯池春水渡瀛海夕陽樓
雪照潘郎鬢塵侵季子裘
勞生已強半更欲玷清流

和詵上人雪詩

貧巷仍飛雪空庭迥絕塵
照窗疑不夜著樹忽驚春
枕冷夢魂短山明天宇新
賦詩分氣象定有灞陵人

澗上

遠徑留殘照疎林出小園山川半豺虎歲月且琴尊杜
老新雞柵龐公舊鹿門不才真忝竊人道典刑存

九日懷尹無忌

茅屋秋蕭瑟幽居盡日閒碧雲看欲暮遠客幾時還書
劒成何事風塵只強顏思君千里夢夜夜到燕山

王隱二首

謝竹堂先生見過

學稼古寺側結廬高柳陰音書故交絕歲月杜門深
新雪添衰鬢寒灰死壯心西州賢別駕連日肯相尋

次韻之秋日雨後韻

洺州秋雨後幽勝可供閒白首留他縣歸心繞故山野
泉來竹底危磴入雲間尚記登高會重岳細菊斑

史蕭二首

河上

窗外三竿日河邊八尺泥夜風喧馬櫪秋露冷雞棲歲

月吾生老關山客夢迷故園桃李樹搖蕩不成蹊

別張信夫

破壘殘星沒寒城曉角孤天低雲錯莫野曠雪模糊小
市千錢米征人丈八戈邊愁故未已不敢恨長途

龐鑄二首

景骨城驛中夜雨

畫角邊城暮孤舂野水秋一川霜樹老萬葉雨聲愁自
古誰青眼勞生只白頭何時問漁父容我亦扁舟

晚秋登城樓

落日危樓上詩成只自哦清商行老矣紅葉奈秋何墮
甌前非悟跳丸去日多功名猶誑我未許著漁蓑

劉昂霄一首

趙村晚望

放眼東原上風烟接渺茫林疎出村落野迥散牛羊天
地浮元氣山河半夕陽登高一長嘯未覺阮生狂

王元粹一首

旅次

旅次渾無定生涯亦漫勞
病求方士藥寒憶故人袍
避俗惟黃卷忘憂但濁醪
柴門多落葉昨夜朔風高

趙亮功一首

甘露寺

鄭南峰下寺白石間疎篁
飛雨度山閣閒雲生野塘
簷前松子落厨際栢烟香
別後聞鍾磬山陰空夕陽

朱弁六首

客懷

兵氣常時見客懷何日開形骸病自瘦鬢髮老相催已
負秦庭哭終期漢節回風雷識我意一雨洗氛埃

白髮

白髮使車前烟波思渺然霜清穫稻日風急授衣天客
館但愁坐釣舟誰醉眠乘槎會有便真到斗牛邊

戰伐

戰伐何年定悲愁是處同黃雲縈晚塞白露下秋空魚

躍深波月鳥啼落葉風誰知渡江夢一夜繞行宮

十七夜對月

病骨怯風露愁懷猷甲兵人居絕域久月向北宵明輪
仄初經漢光分半隱城遲遲不肯下應識異鄉情

上巳

行行春向暮猶未見花枝晦朔中原隔風烟上巳疑常
令漢節在莫作楚囚悲早晚鸞旗發吾歸敢恨遲

寒食

清明六到客愁邊
雙鬢星星只自憐
兵氣尚纏巢鳳閣
節旌已落牧羊天
紙錢灰入松楸夢
錫粥香隨榆柳烟
北向鴈來寒霧隔
音書不比上林傳

洪遵一首

宣鎖

禁門深鎖寂無譁
濃墨淋漓兩相麻
唱徹五更天未曉
一池月浸紫薇花

酈權一首

留仲澤

朝衫猶濕紫宸霞
暫輟旌旗擁使車
馳馬彎弓真將種
載書囊筆自名家
江湖萬里春回鴈
燕趙千林月滿花
明日升沉便霄壤
更留玉樹倚蒹葭

郭明復一首

成都人隆興癸未
登科仕不甚達

琵琶亭

香山居士頭欲白
秋風吹作湓城客
眼看世事等虛空
雲夢胸中無一物
舉觴獨醉天為家
詩成萬象遭梳爬

不管時人皆欲殺夜深江上聽琵琶賈胡老婦兒女語
淚濕青衫如著雨此公豈作少狂夢與世浮沉聊爾汝
我來後公三百年潯陽至今無管絃長安不見遺音寂
依舊匡廬翠掃天

陸士規一首

秦檜
門客

過黃陵廟

東風吹草綠離離路出黃陵古廟西帝子不知春又去
亂山無主鷓鴣啼

趙葵一首

慧山寺

古木森森映綠苔
嵯峨樓閣倚天開
山僧不問朝天客
自注冰泉插野梅

趙師秀三首

題薛氏瓜廬

不作封侯念
悠然遠世紛
惟應種瓜事
猶被讀書分
野水多於地
春山半是雲
吾生嫌已老
學圃未如君

巖居僧

開扉坐石層盡日少人登一鳥過寒木數花搖翠藤茗
煎冰下水香炷佛前燈吾亦逃名者何因似此僧

桃花寺

舊有桃花樹人呼寺故云石幽秋鷺上灘遠夜僧聞汲
井連黃葉登臺散白雲燒丹勾漏令無處不逢君

翁卷六首

贈滕處士

識君戎馬際今又十年餘環海纔安息先生便隱居清
風三畝宅白日一牀書長是門閒掩鄰僧亦不如

贈九華李丹士

行遍東南地曾看江水源袖藏勾漏藥身是老君孫去
住雲相似枯榮事不論九華峰最碧相對舊柴門

同徐道暉文淵趙紫芝泛湖

相逢亦相親吟中得幾人扁舟當夏日勝賞共閒身山
雨曾添碧湖風不動塵晚來漁唱起處處藕花新

寄從善上人

數載不相見，師應長掩關。
香烟前代寺，秋色五峰山。
暮進僧誰敵，琴餘鶴共閒。
幾時重過我，吟詠此林間。

幽居

蓬戶掩還開，幽居稱不才。
移松連嶠土，買石帶溪苔。
藥信仙方悞，衣從古樣裁。
本無官可棄，安用賦歸來。

隱者所居

百事已無機，空林不掩扉。
蜂沾朝露出，鶴帶晚雲歸。
石

老苔為貌松寒蘚作衣
山翁與溪友相過轉依依

徐璣四首

山居

柳竹藏花塢茅茨接草池
開門驚燕子汲水得魚兒
地僻春猶靜人閒日更遲
山禽啼忽住飛起又相隨

登橫碧軒繼趙昌甫作

步陟高高寺徐行不用扶
春天晴又雨山色有還無
句向閒中覓茶因醉後呼
所懷論未足何乃又征途

夏日懷詩友

流水階除靜孤眠得自由月生林欲曉雨過夜如秋
遠憶荷花浦誰吟杜若洲良宵恐無夢有夢即俱遊

夏夜同靈暉有作奉寄翁趙二丈

齋居惟少睡露坐得論文涼夜如清水明河似白雲
宿禽翻樹覺幽磬度溪聞欲識他鄉思斯時共憶君

徐照二首

題翁卷山居

空山無一人君此寄閒身水上花來遠風前樹動頻蟲
行黏壁字茶煑落巢薪若有高人至何妨不裹巾

貧居

既與世不合當令人事疎引泉魚走石掃徑葉平蔬誰
念交情淺難如識面初榮途多寵辱未敢怨貧居

李邴

宮詞三首

舞袖何年絡臂韝蛛絲網斷玉搔頭羊車一去空餘竹

紈扇相看不到秋

蛟綃淚滴鴛鴦冷月上欄干照孤影躑躅開花過粉牆
輓轡汲水敲金井

妾意長如鳳管寒君恩不學縷衣寬漢家公主歌黃鵠
猶有琵琶馬上彈

岳珂一首

經筵百韻詩

臣一介庸庸濫饗世祿每念沉寃未雪直筆久

汚一意纂修五年勤瘁上千宸覽誤簡淵衷萬
死尚寬九殞莫報今因追感先臣飛事輒賦百
韻詩一篇繕寫躬詣天庭投進伏望聖慈特賜
睿察昭白而施行之千冒天威臣下情無任惶
懼震越屏營之至

永祐當臨御重熙極泰亨物窮隍土覆地大孽牙萌條
爾邊城饗違吾海上盟風塵昏九土氛霧塞三精於赫
中興主初專九伯征赤符觀炳炳喜兆得庚庚四七膺

休運三千協一誠乾坤恢闢隘日月洗明清天授睢壇
英風興渭水英維時臣大父韜迹聖廛氓寶匣鳴長劍
雄冠彩曼纓衣裘供羿射燈火近韓檠聖世方求駿明
神宜舍駢始從魚鑰守小析羽林兵嘗敵無車乘麾軍
不鼓鉦熏門推彥政汜水從閭勅驛召班龍節屏軍下
雀旂王師俱蓄縮敵騎愈縱橫馬渡朝迎敵鍾山夜駐
營狂瀾身砥柱大厦手支撐烽燭猶煩熾吳都忽震驚
東巡傳警蹕右袒半公卿憤起宜興旅追收建鄴城大

江誰飲馬五嶽更刑牲一蕩西江李重殲固石彭利兵
驅虎豹傑觀築鯢鯨玉帳旋平廣銅符遂帥荆皇靈期
濯濯王事分傍傍犄角防奔鹿山林息聚蠱神州宜亟
復六郡乃先爭桀黠徒馮壘苗民敢抗衡銳師掀狡窟
高堞覆堅棚鼎澧兵方進湖湘寇輒平幾年堯禍結八
日駿功成叛將因資用降人宜畏阬開疆下商號結約
到磁洛謀帥難張俊還兵慮鄺瓊但虞遺後患初匪厭
紛更沔鄂重歸鎮齊劉尚據京且羞離楚饌未用渡河

罌細柳千屯竈柔桑萬瓦甕流民俱授畝戰士亦從耕
夫澮縈如帶原田畫若枰連雲登美稼浙玉飯香杭芻
輓從今省兵儲亦煩羸吏貪無碩鼠民佚異魴鰕姑定
鴻溝約交馳絕域倅鄰歡新玉帛宴衍樂簫笙未幾邊
搖草惡知野食革禮容方濟濟革乘忽駟駟睿斷昭雄
武天威震隱砮六師紛霧集四校盛雷轟戎駕爰方啓
神鋒莫敢撓童髻欣再見父老喜前迎義氣通諸夏謳
聲沸八紘官兵颺隼鷺天象掃欃槍跬步臨京闕朝衣

詣寢楹晉軍傳鶴唳楚幙聽烏鳴機會乘今日雌雄決
此行幸成千載績歸捧萬年觥何事東來詔遙追北指
旌撫膺皆壯士牽袂有啼嬰棄屐登樞極雍容儼佩珩
身雖處廊廟志則在幽筭豈意中原略深違時相情和
戎徒効散投兒不聞螢正爾先鞭著居然謗篋盈亮威
揺吏憤風旨動臺抨臬虺飢吞噬鷹隼樂使令衆壑常
忌冠同浴不譏程遠慮為徼福先驅謂緩程一言鳴仗
馬千丈下喬鶩盍攷謝赦表兼觀賜劄評許身無少媿

憂國甚於醒被譖宜投虎能言不離鸚鳥翔身蚤腹免
健足先烹有客悲周道何人歸魯祊同時惟切齒來者
但懲羹長夜何時旦沉陰幾日晴是非從久定禍否待
終傾先帝資神武深仇愴父兄每懷得頗牧胡忍棄韓
黥哲監何嘗惑孤忠果漸明岳陽還舊號嶺表返諸惇
故壘營新祀畿封闕賜塋用心傳舜子述事廣文聲甘
雨興餘稿青天豁久盲先臣死不朽聖德浩難名陛下
今湯禹王臣昔散閔令圖天廣大盛烈日鏗錡心述參

堯運規模紹漢宏遺形高閣繪良辰盛朝賡故將幸非
遠微臣矧敢輕傳謠嵇史謬敗俗訂言寧日繫無虛筆
雲章有滿籊竹書皆歷歷玉訓尚鏗鏗願輟清朝暇叨
承乙夜呈作詩哀寺孟覽奏念緹縈恩錫茅封寵光昭
哀宇榮誓懷如皦日忠報畢餘生

林外一首

題壁

藥爐丹竈舊生涯白雲深處是吾家江城戀酒不歸去

老却碧桃無限花

張仲威一首

設醮靈仙

瑞氣葱葱雨露邊
壁門金闕倚層巔
青霓絳節巖中夜
綠葢丹輿會九天
香染舊泥封寶洞
聲傳鳴鶴湛靈泉
分明步入烟霄上
何必餐霞駐少年

朱敦儒一首

小盡行

藤州三月作小盡梧州三月作大盡哀哉官厯今不頒
憶昔昇平淚成陣我今何異桃源人落葉為秋花作春
但恨未能與世隔時聞喪亂空傷神

陳傅良五首

送郭希呂

我門閉重重我徑阻且深梅花獨相依聊以慰我心
美人從何來崎嶇自幽尋亦于琢冰中而和南風琴
菜甲尚可羹新藟是同斟不知歲已華歸興生霜砧
欲別復

少住棲烏歸月林客去鳥翔飛落花滿牆陰

仰止亭

可愛南山與北山北山上有斗芒寒碧雲歸盡人何在
更捲朱簾到夜闌

海棠

淡月看花似霧中遽呼燈燭倚花叢夜來月色明如晝
却向庭蕪數落紅

送周介之同年赴德化宰

民社須吾黨江湖足此情不堪秋暑近欲趁暮潮平拙
宦成華髮憂時自短檠君看廬阜石千載尚垂名

和朱宰遊丁園韻

榆火逢佳節棠陰接勝遊移尊忻及暇乘屐共尋幽日
靜竹光合風暄花氣溥主情殊未倦衰暮為遲留

劉迎十一首

海上

潮蹙三山島烟橫萬里沙蜃樓春作市鼉鼓暮催衙一

曲水仙操片帆漁父家安期定何處試問棗如瓜

秋郊

秋水四五尺暮山三兩峰浮雲白毫相落日紫金容
蓑笠前村笛樓臺古寺鐘殷勤小平遠圖畫記渠儂

代人憶舊

緩步素絲障微吟紫綺裘醉便風側帽歌愛月明樓
犀軸題春恨銅荷滴夜愁風流十年夢燈火漫揚州

題吳彥高詩集後

片雲蹤迹任飄然南北東西共一天萬里山川悲故國
十年風雪老窮邊名高驥北無全馬詩到西江別是禪
頗憶米家書畫否夢魂應逐過江船

代王簿上梁孟容副公

妙年椽筆賦長楊一日聲名滿四方天上風流青瑣客
人間嘉慶綠衣郎錦囊看讀金花誥畫戟閒凝燕寢香
預恐政成趨急詔海沂無計駐王祥

明日復會客普照繼呈此詩去及瓜不數日矣

室中呼起散花天來伴維摩到處禪百刻篆香消晝永
一番花雨破春妍雲山真欲追聲叟風腋何妨借玉川
他日相思共明月舊遊應說禁烟前

陪諸友登三山亭

半濠清淺芰荷彫落日登臨未寂寥山色逼秋渾作市
海聲迎暮欲吞潮沙頭白鳥疑相熟木末青旗苦見招
不似常時對官府可無閒話及漁樵

次韻鄺元與贈于元直道舊

倦游方嘆錦囊空
此道誰知一夕東
客裏簿書慚老子
詩中旗鼓避元戎
叩門莫厭經過數
促席聊容語笑同
此樂祇憂兒輩覺
不應品藻待渠公

郭熙秋山平遠用東坡韻

槐花忙過舉子閒
舊遊憶在夷門山
玉堂曾見郭熙畫
拂拭縑素塵埃間
楚天極目江天遠
楓林渡頭秋思晚
烟中一葉認扁舟
雨外數峰橫翠巘
淮安客宦踰三霜
雲夢澤連襄漢陽
平生獨不見寫本
慣飲山綠餐湖光

老來思歸真日日夢想林泉對華髮丹青安得此一流
畫我臨筇水中石

河橋

桃李香中八九家青旗高掛綠楊斜晚來風色渡頭急
滿地蕭蕭楊白花

盤山招隱圖

溪山不難賞所費千金儲不如數峰雲朝昏對吾廬交
游豈無人轉盼傷離居不如吾兄弟相應如笙芋左侯

薊名族溫溫器璠璣身雖市朝寄心與功名疎伯也亦
可人文華炳於菟風神聳魁偉襟韻含冲虛平生一片
心緣塵不關渠相期有幽事歲晚山林俱綵服照黃冠
歡呼奉親輿大婦侍巾帨中婦供庖廚諸孫戲膝前翩
然鳳將雛朝采南澗片暮漉西溪魚烟霞入杖屨風月
來窗疏觀竹上巢雲禮佛登香爐紅龍雪浪湧白塔蒼
烟孤水絃寫天籟茶甌泛雲腴快哉天下樂俯仰餘何
須正恐老太冲招隱昔所無

姚孝錫八首

題柳溪別墅

雨霽風和不動塵
柳邊攜酒賞晴春
頻來溪鳥渾相識
度水穿花不避人

謁滕茂實祠

本期蘇鄭共揚鑣
不意芝蘭失後凋
遺老祇今猶涕淚
後生無復識風標
西陲鴈度霜前塞
滹水樵爭日暮橋
追想平生英偉魄
凌雲一嘆豈能招

次韻秋興

老畏年光速，愁添旅夢多。
西風著梧竹，歸思入烟波。
夜永憑詩遣，顏衰得酒和。
故溪千樹柳，誰復曬漁蓑。

次韻王無競見寄

客懷重寄仲宣樓，白草黃雲塞上秋。
山色不隨塵世改，水聲還抱故城流。
隙中畏景那堪玩，鏡裏衰顏祇自羞。
多愧詩人苦相憶，遠傳佳句弔清愁。

感白髮

彈鈇憑誰聽客歌震雷那復化魚梭
梳頭白雪驚新有障眼玄花比舊多
鄉問阻兵猶斷絕羈懷憑酒暫消磨
不須更問今朝客門外元無雀可羅

溪橋早春

輕黃未染柳稍勻連日溪風捲塞塵
乍暖乍寒花信晚相呼相應鳥聲頻
少勤謾挾經綸策老懶空餘病患身
追憶故園桃李樹年年紅紫為誰新

登樓有懷

老愧憑欄目力昏百年懷抱向誰論
晴空鴈起雲邊塞夕照人歸郭外村
因記昔遊驚迅晷暫將離恨付清樽
誰人肯似邊居士遠駕朱輪過雀門

歲晚懷二弟

少易成歡老易傷壯遊垂白未還鄉
烟塵無復音書到魂夢猶疲道路長
爆竹又驚新薦歲屠蘇空憶舊傳觴
年年此日遙相憶鴻鴈何時續斷腸

滿執中二首

瑯琊溪

岩下桃花紅溪流碧如玉逋翁隔雲歌不是人間曲

明月溪


月出溪水清月落溪水黑茫茫溪上人笑與月為客

向巨源一首

登五老亭得寫字

茲山何巍巍氣欲等嵩華從公二三子勝日飽閒暇躋
攀謝車輿自辦兩不借捫蘿覓幽際行椒得孤榭側送

夕陽移俯視高鳥下登臨記曩昔歲月驚代謝却數一
周星復命千里駕身從泛梗流事與浮雲化竭來共一
尊似為天所赦明登還問塗合離足悲吒



宋藝圃集卷十八

欽定四庫全書

集部

宋藝圃集卷

十九
二十

詳校官中書_臣陸 湘

侍讀_臣孫球覆勘

總校官庶吉士_臣何思鈞

校對官編修_臣李堯棟

謄錄監生_臣劉 璣

欽定四庫全書

宋藝圃集卷十九

明 李萊 編

嚴羽五十首

登豫章城感懷

憂來不自得登城望高天
寒雲四面起朔氣下長川
脫劔且却坐君知心惘然
奈何平生志鬱抑江湖間
凜凜秋風來茫茫落日晩
長憂生白髮沉想忘朝飯
向來經

金史口乃人三十一
卷十九
濟士本自碌碌人蕭曹刀筆吏樊濯市井臣徒步取勲
業漢道為光新我今何為者飄飄去鄉國狂歌豫章城
醉臥風江碧但取英雄笑終慙個儻生名當以德載事
恥因人成獨酌還獨酌哀歌還寂寞安得凌風翰為君
拂寥邈

夢中作

予客廬陵日夢至一大府主人自稱劉荊州與
予觴燕各賦詩為樂覺而髣髴其一二因續成

之

少小尚奇節無意縛珪組遠近江海間登高屢懷古前
朝英雄事約略皆可覩將軍策單馬談笑有荆楚高視
蔑袁曹氣已蓋寰宇天未豁壯圖人空坐崩沮丈夫生
一世成敗固有主要非伯儼人未死名已腐夫何十載
後亦忝趨太府主人敬愛客開宴臨長浦高論極興亡
歷覽窮川渚殷勤芳草贈窈窕邯鄲舞愧無登樓作一
旦濫推許懷哉揮此觴別路如風雨

劉荊州答

皇漢失中德四海橫雕戈驚塵暗九有豺虎臨長河流
人滿川谷積屍亂如麻關洛既蕩析楚壤空嵯峨謬當
牧守寄無以救時訛竟貽百代誚家世隨蹉跎安知千
載下夫子感慨多人生固有志成敗飄風過且復登城
隅逍遙望山河日暮襄漢碧鳬鴨遊輕波何以慰我心
玄熊問黃鵠清觴宜城酒二八邯鄲歌願言寫懷抱聊
用寬吾家勿言此歡易樂罷歸無何

廬陵客館雨霽登樓言懷寄友

終日坐汾渙邈然無少欣登樓一周覽始見萬山羣微
雨洗殘暑青天卷浮雲襟懷兩廓落朗若見夫君見君
君何在顧影還獨笑吏非金門遊隱異滄浪調江明秋
月白山空夜猿嘯徒事百卷文未返一竿釣留滯豈勝
愁非君誰與謀水寒終赴海鴈遠暫賓秋舉世不可語
猶當傲巢由贈君三尺劒永駕五湖舟

送嚴次山

四年棲嶺表三歲客海東人生貴安適奔走成何功去
年喜歸來山花春蒙茸弟姪各捧觴一笑生華風南山
多紫芝北山多白薇雲空汗漫臺月午生涼輝俯仰僅
一載脂車復征西豈以丈夫志萬里猶庭闈故園松桂
林一一含真姿何時賦歸來毋令久疑思

遊臨江慧力寺

舟中望古剎川上移琴樽隱隱林閣見迢迢鐘梵聞列
岫不離席驚濤常在門風帆與沙鳥汎汎隨朝昏天高

一幅掛靜室衆香焚煙起多近郭鴉歸無遠村松際上
微雪經聲來暮猿賞惟靜者契法對高僧論安得息塵
駕永懷瞻獨園明朝別此去惆悵滿松雲

山居即事

稍欣入林深已覺煩慮屏霜果垂秋山歸禽度風嶺紛
紛葉易積漠漠雲欲盛磻戶寂無人松蘿窅然暝惟聞
山鳥啼月出柴門靜終歲寡持醪延歡聊煮茗羣書北
窗下帙亂誰能整

遊仙

六首

秋澗夜瑟瑟月露明團團褰衣步澗月忽見雙飛鸞上
有騰空仙天風飄珮環清歌映岩谷粲若玉煉顏願昇
綠雲去隨君向仙關噉食長不老何用思人間

二

憶讀玲瓏篇來往虛皇閣空見白芙蓉秋風幾凋落昨
逢紫陽君共有丹臺約下視塵埃中冠纓縛猿獮世事
行若此悠悠復何託

三

五老出東南崔嵬相間隔清晨登絕頂處處仙人跡朱
霞散九光岩谷好顏色回首空澄湖黃濤正喧擊石上
絃素琴神歡心自清仙童三四人忽來左右聽嘹嘹誦
金書勸我餐瑤瓊贈我一玉塵邀我凌雲行舍琴與之
去恍惚在蓬瀛

四

朝別簡寂觀夜行石徑溪溪光照崖綠月色正相宜石

上三道士頽然好丰安手弄金光草或把珊瑚枝憑風
招素手賜我一玉卮嘆我事遠遊蕭颯朱顏衰長林孤
月落羽蓋何處蕤童童乘之去棄我忽若遺明發聞無
覩但有青鸞啼

五

翩翩南來雲如飛百隻鶴我行忽見之眇然意欣樂五
峰何峻秀靈草生琅夢願乘此雲去去鍊黃金藥千載
倘歸來不復見城郭

六

瀑布好明月上有石梁橫
橋首望東海正見蟾蜍生揚
輝天漢間下照蓬丘城桂實
幾凋落姮娥空聞名咄哉
玉斧子不如白兔精靈藥不
服食執柯獨何成迢迢彩
雲外誰吹白玉笙竦身一長
聽了然出衆瀛

過逍遙山

來過許仙宅復窺洪崖井
地逐靈勝高興接煙霞永伊
余坐昏墊久欲還林嶺明發
囊中砂歸歟鍊顏景

古懊惱歌

五兩轉須臾相望奈何許寄與黃帽郎船頭慢搖櫓君
子如白日願得垂束光妾身如螢火安能久照郎郎去
無見期妾死那瞑目郎歸認妾墳應有相思木船在下
江口逆風不得上結束作男兒與郎牽百丈朝亦出門
啼暮亦出門啼蛛網挂風裏遙思無定時懊惱復懊惱
懊惱無奈何請郎且少住聽妾懊惱歌

劍歌行

贈吳會卿

劍歌行借君劍為君舞自古英雄重結交樽酒相逢氣
相許愛君個儻不可羈與君一見心無疑疎眉大額長
七尺神采照耀仍虬髯雄詞落紙走山嶽霹靂繞壁蛟
龍隨如何十載困羈旅此心獨未時人知去年從君禦
強寇舉鞭直解揚州圍論功不及驃騎幕失路羞逐邊
城兒歸來寶劍掛空壁白光夜夜驚虹霓推斗醜酒且
高會酣歌擊筑焉能悲百年快意當若此迂儒拳局徒
爾為我亦摧藏江海客重氣輕生

闕

送吳卿再往淮南

故人身披紫綺裘腰佩寶玦騎驊騮英風俠氣橫四海
辭我遠向淮南遊淮南桂樹應猶在八公舉手遙相待
明月高懸五兩頭隨君千里過淮流十年鞍馬邊城道
又向邊城見春草春草萋萋路入秦長安北望空愁人
荆楚奇材多劍客感慨相逢思報國男兒事業早致身
青鬚須防雪霜迫我向人間久拂衣白雲相伴掩岩扉

調琴鼓罷清商曲愁見孤鴻天際飛

古劍行

我有三尺劍懸膽光陸離刺鐘並切玉如泥水斷蛟龍
陸刺犀三軍白首纔一揮惜哉挂壁無所施使之補履
不如錐吾將抱憤慙玉帝手持此劍上天飛

還山吟留別城南諸公

日暮望寒山惆悵歸思發如何山中客屢看城頭月山
中月明女蘿秋石磴潺湲瀉碧流巖猿久別應惆悵澗

鳥相呼亦共愁城南故人與我好令我忘却歸山道昨夜西窗夢到家忽驚千嶂芝花老朝來舟子促辭君回首空江語尚聞別後莫嗟難見面相思只望嶺頭雲

孺子臺吟

去年醉與東湖別欲上衡湘泛秋月君家留我却還迴
悵望還成阻修濶西山縹緲翠屏開復憶滕王倒玉盃
經過始識洪崖井調笑重登孺子臺臺前呼酒折荷花
水淨煙明散落霞舉杯失笑今何在望斷行雲空咄嗟

故人別後還愁緒此都不是余留處興來目送海邊鴻
歸心掛在閩溪樹路逢估客有情人因得題詩一寄君
大鵬正展圖南翼空有相思隔海雲

思歸引

海上之草綠芊芊洞門一閉今幾年仙驥去時留紫鞍
掛壁見之心惘然欲歸即歸亦由我不待功成何不可
堯舜不能屈由巢自餘王侯何足交武陵春水綠堪染
就中亦有桑麻郊近聞秦人笑相語待我東溪種碧桃

別客

客鬢風霜晚離亭鼓角聞念君當此去把袂不能分
衡霍連秋氣瀟湘合暮雲愁心將落葉向晚共紛紛

江樓月夜懷故山友人陳聘君吳樗卿

昨夜江樓月思君好斷腸猿聲相應發山色更青蒼
楚塞來書遠閩關隔夢長今朝看愁髮為爾半成霜

江上有懷上官長史

憶君悵不樂立馬大江邊塞鴈來無際驚沙度颯然客

心懸日夜書札斷雲天莫作青山老空為人所憐

有懷閩風山人

把酒忽惆悵君今吳楚間孤雲隨馬首風雨隔河關
心事竟安在此行殊未還空將百年意泣向寶刀環

懷南昌舊遊

昨在南昌府清遊不可窮杯行江色裏棹進月明中
樓笛吹晴雪菱歌漾晚風坐來懷舊迹萬里亦飄蓬

望西山

西山橫翠新中隱石仙真笑取玉塵尾
拚茲丹霞人雲從石洞出月落滄江瀕
子亦將高臥藤蘿掛葛巾

喜友人相訪擬韋蘇州作

朝朝竹林院閉戶讀殘書
几閣晨風入荒庭寒露餘
故人步履至清坐每踟躕
輟卷還留興漱泉同飯蔬

閒居寄友

蕭條遺世心江海坐來深
擁褐閒窺沼思山欲借琴
有幡山際寺無葉水邊林
不見同袍友同誰伴苦吟

吳江春望

客有東南別，憑高正憶家。
青春江上草，湖日岸頭沙。
去鳥無邊盡，歸帆幾處斜。
音徽不可問，惆悵結瑤華。

秋夜歸汝館懷友人陳聘君賴竹莊

秋聲動梧竹，月色滿庭蕪。
此夕懷良友，天涯各一隅。
飛羣過鴈切，切未棲烏安。
得從君去，扁舟駕五湖。

送張季遠入京

手把一枝菊，贈君十里行。
山川遙滿目，何處是吳京。
飲

龍北風起蕭蕭胡鴈聲東流倘未盡見我望君情

訪益上人蘭若

獨尋青蓮宇行過白沙灘一徑入松雪數峰生暮寒山
僧喜客至林閣借人看吟罷拂衣去鐘聲雲外殘

蜀女怨

幾時離月峽吾見紫蘭凋塞鴈隨魂折江花逐淚飄沙
頭南北客京口去來潮日日無消息空登萬里橋

寄山中同志

我有三足麕放之在碧山別來幾十日昨夢忽乘還松
色入天盡岩花落地閒憑君一問訊沿月上潺湲

豫章城

暝色蒹葭外蒼茫旅眺情殘雲和鴈斷新月帶潮生天
到水中盡舟隨樹杪行離家今幾宿厭聽棹歌聲

臨川逢鄭遐之雲夢

天涯十載無窮恨老泪燈前語罷垂明發又為千里別
相思應盡一生期洞庭波浪帆開晚雲夢蒹葭鳥去遲

世亂音書到何日關河一望不勝悲

客中別表叔吳季高

悠悠遠別半生悲白日相逢又語離
海內風塵驚不定天邊消息到何時
洞庭旅鴈春歸盡瓜步寒潮夜落遲
惆悵孤舟從此去江湖未敢定前期

和上官偉長蕪城晚眺

平蕪古堞暮蕭條歸思憑高黯未消
京口寒煙鴉外滅歷陽秋色鴈邊遙
晴空未落長疑雨暗浦風高欲上潮

惆悵此時頻極目江南江北路迢迢

夜泊

夜聞沽客送將歸蕪蔕蕭條月色微
萬里江湖何處極孤舟鴻鴈自相依
杯拋黃菊乾賒酒城掩秋砧罷搥衣
不禁此時心斷絕長沙南去故人稀

寄郭招甫時在潯陽

夢向三江買釣船掛帆南去白雲邊
窗開曉色香爐現門落寒聲瀑布懸
百年酒興陶彭澤四海詩名孟浩然

何日尋真塵外跡焚香酌茗話先賢

登滕王閣

高閣憑空浩蕩開當時遺跡幾蒼苔烟含晚市悠悠見
沙帶澄潭渺渺回此日登臨分壯氣百年淪落憶雄才
可憐萬古神交意日暮荒涼一嘆哀

紫霞樓夜飲

西樓孤絕倚天青我愛明河對戶橫露滿碧梧風屢起
烟消綠嶠月初生仙人共酌丹霞酒逸侶同吹白玉笙

不向此時窮笑傲更從何處豁高情

聞笛

江上誰家吹笛聲月明霜白不堪聽孤舟萬里瀟湘客
一夜歸心滿洞庭

答李友山山中送別

已恨青山臨渡口相思回首隔夫君更堪重到相思處
不見青山見白雲

酬故人見贈

湘江南去少人行
瘴雨蠻烟白草生
誰念梁園舊詞客
枕榔樹下獨聞鶯

閨中詞

良人西去恨何如
妾在閨中對影居
萬里長看天外月
一生空得夢中書

塞下曲二首

古戍秋生畫角哀
思歸泣盡望鄉臺
霜天日落寒風起
但見黃沙萬里來

玉關西去更無春
滿眼蓬蒿起塞塵
漢馬不歸青海月
笳聲愁殺隴頭人

絕句

集中無
此篇

萬里長江歲暮天
冰堅可渡不須船
雪堂老子迎君笑
化鶴歸來又百年

林德暘二十八首

寄林編修

名十之
平陽人

大雅凋零尚此翁
醉鄉一笑寄無功
衣冠洛社浮雲散

弓劍橋山落照空東魯有書藏古壁西湖無樹挽春風
巾車莫過青華北城角吹愁送暮鴻

道中

程入江鄉宿新炊飯帶沙亂山愁外笛孤驛夢中家野
水平荻葉春風足棗花西來三兩客閒說舊京華

春感

柳花袞雪春冥冥溪風一夜吹為萍萍隨風去渺流水
人生無根亦如此故山入夢草芊芊半窗疎雨寒食天

曉來白髮稀可數多少朱顏化黃土高原冉冉青烟斜
麥飯洒松能幾家子規叫殘金粟暮繭紙蘭亭已飛去

聞家則堂大參歸自北寄呈

丙子春巴延兵至杭州則堂家鉉翁以參

知政事與丞相吳堅等充祈請使詣燕申祈請之議國亡守志不仕敗河中府十九載至元三十一年甲午召還放自便乃歸江南時八十有二矣

濱死孤臣雪滿顛冰瓊齧盡偶生全衣冠萬里風塵老
名節千年日月懸清淚秋荒遼海鶴古魂春冷蜀山鵲
歸來親舊驚相問未黍離離夕照邊

答榮主簿

相隔雲江有夢尋
篇詩寄舊重兼金山林未遂鹿麋性
風雨空愁葵藿心
老氣十年看劔在秋聲一夜入燈深
銅槃消息無人問
寂寞西樓待鴈音

元日即事

宿霧沈城海日遲
十年冉冉鏡中絲
江湖舊夢衣冠在
天地春風鼓角知
杜曲桑麻歸已往
尚平婚嫁畢何時
野人問我行藏事
自向庭前來柏枝

寄七山人

平陽州治北五里有七星山鄭
初心隱居於此稱為七山人

十年疎鬢為誰斑
天借儒冠日月間
敲枕寒生雙瀑潤
開門春滿七星山
鶴歸尚覺遼城是
鵲老空聞蜀道難
欲覓九還憑寄語
青牛何日度函關

拜岳王墓

岳飛葬西湖
之棲霞嶺

寥落一抔在英雄
萬古冤孤忠懸白日
遺恨寄中原樹
老殘霞澹塵深斷碣
昏東南
天半壁往事泣寒猿

夢中作二首

一杯自築珠丘土雙匣猶傳三國經獨有春風知此意
年年杜宇泣冬青

昭陵玉匣走天涯金粟堆前幾莫鴉水到蘭亭轉嗚咽
不知真帖落誰家

冬青花

冬青一名女貞木一名萬年枝漢宮
嘗植後世因之宋諸陵亦多植此木

冬青花花時一日勝九折隔江風雨清影空五月深山
護微雪石根雲氣龍所藏尋常螻蟻不敢穴移來此種
非人間曾識萬年觴底月蜀魄飛遶百鳥臣夜半一聲

山竹裂

鄭宗仁會宿山中

挑燈懷舊夢移席近春泉共話忽深夜相看非少年
斗垂天末樹燐出雨餘田亦有茅簷下飯斗人未眠

飛雲渡

人煙荒縣少澹淡隔秋陰帆影分南北潮聲變古今
斷峰僧塔遠初日海門深小立蘆風起乘槎動客心

宿台州城外

金匱山志卷十九
荒驛丹丘路秋高酒易醒霜增孤月白江截亂峰青旅
鴈如曾識哀猿不可聽到家追此夕三十五郵亭

客懷

道出蕭臺北青鞵第幾山看雲生遠思臨水覺衰顏石
室援空老花時燕獨還春光已愁寂况復在兵間

僊壇寺西林

古壇僊鶴杳野鹿自成羣松氣浮清曉經聲出白雲石
穿僧屋過水到寺門分人世無窮事山中了不聞

新昌道上

江湖猶是客歲月已成翁
僂路重雲外人家落水中
山痕經燒黑土脉入泉紅
又得春風信孤花照驛東

寄懷

風雨知何夕干戈寄此身
青燈少年夢白髮異鄉春
水驛逢花使丹田守谷神
行窩隨處得聊自得吾真

越中送徐君寅歸閩

此地同為客當秋獨送君
斜陽留薄醉遠道惜輕分
老

汨遺陵木鄉山出海雲天南有回鴈音信倘相聞

重過虎林

漠漠江湖夢蕭蕭未黍秋清笳吹落日白髮過西州池
涸神龍逝山空老鳳愁唯餘關外水寂寞自東流

寄別諸公

盍簪談舊夢持酒送餘春天地綠陰雨江湖白髮人時
非銷劍氣客久積衣塵又出重關北斜陽獨問津

京口月夕書懷

山風吹酒醉秋入夜燈涼萬事已華髮百年多異鄉遠
城江氣白高樹月痕蒼忽憶凭樓處淮天鴈叫霜

客意

獨夜愁如此殊鄉老奈何故人經亂少歸夢入秋多衣
敝隣砧動書沉海鴈過燈前空拂劍酒薄不成歌

山中早行

短策穿幽徑山樵半掩扉月斜林影薄石盡水聲微一
犬隔籬吠孤僧何處歸相逢松下立風露滿秋衣

溪亭

清秋有餘思日暮尚溪亭
高樹月初白微風酒半醒
獨行穿落葉閒坐數流螢
何處漁歌起孤燈隔遠汀

薛德之之江東簡熊西王諸公

乍逢還又別龍竹葛陂陰
野水流春遠江雲入暮深
新知滿湖海遺老在山林
解后如相問憑君道素心

侍應平坡侍郎郊行口占

試耕黃犢健入社白鷗真
柳外呼舟去水風吹葛巾

宴德初書樓

樓高不二尋已作百尺想中有湖海豪開襟納萬象頗
延素心人談笑落清響鄰花吹午香簷竹薦秋爽於中
了行藏此外斷俯仰西樓富薰天歌鍾樂華敞荒涼風
雨餘山夢自來往

舟中書事

村酒沽來濁可斟扁舟過雨繫楓林午香吹稻海田熟
葛蔓引瓜茅屋深天地暗塵歸客鬢江湖斜日動鄉心

衰年自笑為形役空羨閒鷗臥水雲

別王監簿

玄髮相逢雪滿顛一番欲別一凄然離亭落日馬嘶渡
舊國西風人喚船湖海已空彈缺夢山林猶有著書年
蓬萊不隔青禽信還折南枝寄老僊

新晴偶出

琴牀茶鼎澹相依偶為尋僧出竹扉風動松枝山鵲語
雪消菜甲野蟲飛看花春入枕榔杖聽瀑寒生薜荔衣

古寺無人雲漠漠溪行喚得小船歸

題海上人栖雲樓

水村煙景隔晴霏十二闌干在翠微一壑暮年閒獨倚
半簾秋影澹相依栢爐貝葉香猶潤紙帳梅花夢不飛
會得此中無所住來來去去總玄機

謁子陵祠

客星謫下桐江湄傲睨煙雨何年歸空遺清氣滿林壑
草木不受春風肥我來維舟奠椒醑辟荔祠荒泣山鬼

亂峰欲雪江氣嚴老蜃吹雲日色死白水真人御絳衣
勲臣四七攀鱗飛冥鴻遐舉不可致天地浩蕩容漁磯
年年熏貂成黨獄阿瞞朵鼎終瑟縮東都節義何為高
七尺之臺一竿竹

答周以農

一燈細語煮茶香雲影霏霏滿石牀萬里夢魂形獨在
十年詩力鬢俱蒼山空絡緯悲秋雨水落蒹葭足夜霜
未會漆園觀物意酒闌猶發次公狂

答陳植父

衡門愁絕坐詩窮，瘦策荒途況此翁。
流水年華孤月在，黃花心事幾人同。
鄉書杳杳迎江鴈，客枕蕭蕭避井桐。
昨夜蓴鱸應入夢，扁舟歸去及秋風。

答鄭即翁

初陽蒙霧出林遲，貧病雖兼氣不衰。
老愛歸田追靖節，狂思入海訪安期。
春風門巷楊花後，舊國山河杜宇時。
一種閒愁無著處，酒醒重讀寄來詩。

括城

寒芒曾動少微星一水溶溶疊嶂橫落日漁舟吹遠笛
斷煙戍屋帶荒城沙鷗欲近如招隱關樹無多亦厭兵
却憶鶯花亭外路太平簫鼓沸春聲

謝翱五十首

升菴楊慎曰謝翱羽晞髮集皆精緻奇峭有唐人風未可例以宋視之也

芳草怨

湘雲離離沉曉月疏麻夏死白水發傳芭楚女辭帳中
夜逐霓旌南過越荆岑越嶠殊百草恨結柔絲看不老

紅英搥鹽實斧創青子滿地枝如掃刺桐樹朽猩猩在
佩雜芳蕤散秋海鄉來青鳳食花去瞻望靈均涕零雨

春江曲

妾身生長臨江邊幼嫁酒家學數錢自從夫婿去為賈
別妾初下武昌船潯陽歸鴈不寄影雋州書別已三年
別時夢指水為誓惟有海鳬見妾泪愁拋錦字下中流
卻見海鳬淚如水

廢居行

海濤翻空秋草短白蛇入窠
啗雀卵經年廢屋無居人
孕婦夜向船中產歸來多雨
白生魚穴蟲祝子滿戶樞
鄰家置屋供官役買得沂王
園令宅

古釵嘆

刑徒鬼火去飄忽息婦堆前
殞齊發白烟淚濕樵叟來
拾得慈獻陵中髮青長七尺
光照地髮下宛轉金釵二
持歸薰沐置高堂已裏恐為
神所將妻兒朝拜復莫拜
冉冉臥病不得瘥省知天物
厭凡庸夜送白龍潭水中

扣頭卻顧祈免死永入幽宮伴龍子

瓊花引

后土祠前車馬道天人種花無瑤草英雲藥珠欲上天
夜半黃門催進表酒香浮春露沉沉二十四橋色如洗
陰風吹雪月墮地幾人不得揚州死孤貞抱一不再識
夜歸閨風曉無蹟蒼苔染根烟雨泣歲久游魂化為碧

短歌行

秦淮沒日如沒鵑白波搖空濕弦月舟人倚櫂商聲發

洞庭脫木如脫髮寒蟬哀啼衆芳歇晨梳青林望吳越
吳歆越吟浪花舞秋槎濕劍歸無所愁生酒醒聞山雞
石鏡飛花汗如雨起招如意擊樹枝為君悲歌君淚垂
秋日擬塞上曲

落日墪堍北妖星太白西涼風吹沙磧帳下玉人啼吹
沙復吹草嘶馬未知道醉後聞塔鈴風塵忽如掃野駝
尋水向月行露下蕃兒食秋菓

後瓊花引

揚州城門夜塞雪揚州城中哭明月墮枝濕雲故鬼語
西來陰風無健鶻神娥慙空衆芳歇一夕蒼苔變華髮
宮花窄簾塵掩轡玉華無因進吳越灘灘淮水山央央
誰具死者李與姜

明河篇

牽牛夜入明河道淚滴相思作秋草婺女城頭翫月明
星君冢上無啼鳥天寒露淨沾衣巾明河倏化為白雲
雲飛蜿蜿秋在水石厭槎頭海烟起

虞美人草詞

鬪牒起語鴟呌嘯山精夜啼楚王廟渡淮風雨八千人
叱咤向天成白道身經百戰轉為亡狼籍悲歌出漢堡
夜帳天寒抱玉泣血變青草烟曉濕他年辟仇春草生
吳中草死無妾名自從為草生西楚得到吳中猶楚舞
劉寄奴草詞

榛中小草夏蔚蒼葉如牡艾花如毳少年防塞得命生
出鏃肉中無粟起向來神姦見白晝濕竹烟青聞杵臼

英雄僞臂徵此時唾落虛空散林藪漢家白蛇入本紀
況是天王舊支子宜知苗裔在民伍蛇思猶呼帝小字

樊夫人上昇詞

四明山樊榭即漢劉綱與夫人樊氏上昇處

石壕粘牕秋見海山雞夜啼弄毛彩王孫吹笙導夫人
青髮凌風素霞在雨塵離地白浩浩河西種星榆樹老
海桑童童日出歸衣濕上池洗頭草

花卿冢行

山谷云花卿冢在丹陵之東館鎮至今猶有英氣血食其鄉

濕雲模糊理秋空雨青沙白丹陵東莓苔陰陰草茸茸

云是花卿古來冢花卿舊事人所知花卿古冢知者誰
精靈未歸白日西廟鴉啄肉枝上啼縣州柘黃魂正飛

蓮葉舟

濕雲冉冉依芳芷楚女神絃迎帝子天人種蓮露染根
一片碧花秋墮水笙簫聞聲影如夢浮花漠漠船采重
神蛟蛻腸江水湄化為五色光陸離中有玉人跨蛟舞
藕根斷絲甯人衣碧瞳秋髮眠清夜按肌不粟青露下

玉井水

玉華翳日神封井液冷秋根洗雲影年年天女下來觀
露濕風吹太華頂冰枝脫葉墜欲舞青鳥伺枝忽銜去
夜深井氣白吐虹井中龍子如守宮凡人不敢飲此水
往往夢寐游其中

送人歸烏傷

湖邊老屋牆壓籬饑鴉啄雪枝上啼湖中葑田產菰米
菖蒲花開照湖水蒺藜老翁呼不起曾入東宮教皇子
文雅風流俱掃地瓦磚擲入老兵醉後園小坊近市廛

借人檣蒲無稅錢君歸故里何所憐

雨後海棠

春光搖搖一萬里野粉殘英空蜀水
天人愁溼紅錦窠萬里遺恨泪如洗
蒼苔裏枝雪墮地雨中聞有西南使
化為黃鵠凌空青開時銜花落銜子
綠章青簡下蓬萊滯魄游魂恨未已
至今鸚鵡啼猩紅不隨明月葬空中

登廣靈寺塔望南高峰

寺碑記太宗
潛藩時事

城池風烟杯渡僧廣靈孤塔懸晝燈
塔燈上齊南高雲

南高峰巔祠歛神靈
旗蕭蕭卷清雨結喉
巫陽能楚語
回望入烟塔峰北
惟有空城臨水滸
赤蛇不神江海翻
數澤狐狸作巴舞
當年介弟階防禦
玉鸞青鞭上天去

雪度

千山萬山雪崔嵬
欲流不流水洄洄
蟄熊出穴戍草短
客行心急夢歸來
南園桑柘未生葉
南溪渡頭不可涉
朝種木蘭拔為櫟

夜宿南明縣齋

朝陰扣舷清剌曲暝投天姥峰前宿桂蟲食葉露溼身
影落莓苔雲竄竄天風吹枝斷未殊夢尋香靄來絳車
下車者誰藏姓氏夜饗瓊臺讀老子覺來隱隱聲在耳
月白西南望為水

書畫梅花水僊卷

風吹戰露明微照芳雲弱植仙姝廟髻鬟零亂在枕函
月裏羅浮夢中到鮫綃拂塵蟬翼隔窗霧凝寒唯影入
曉來坐對殘空標翠翎不見額黃濕

避暑城西觀吳道子畫老君像

濕烟掛龍天海頭角城溽暑如炎州白氛翳景失樓閣
蓬萊縹緲不可求解衣揮塵子城下地湧青蓮隣古社
卷簾看畫人猶龍矯首見龍還見畫碧幢髮雪世過耳
弄筆者誰吳氏子

趙安天北遊求詩安天韶王孫作詩送之

海雲抱漚海水熱道路征人裹冰雪憐君獨作萬里遊
兩把蓮莖手中別蓮莖刺多蓮葉濕翻為君衣覆為笠

汴南淮北多故人馬上相逢泪相揖故園萋萋長草根
逴君歸來洗雨痕青鞭碧影角湖曲芳夢猶到韶王孫
鄧女墓

網草新垂月中露青禽夜宿菱塘渚寺西幽修雲覆土
知葬舒王下殤女百年光塵事事新皇子夫人墓作鄰
民間厭勝祈新鬼群鬼久隨風雨陳去來侶爾勿復道
白下鍾山夢中老

城西廢園

水門夾西雨連越鄴瓦畔殘莎草茁誰知當日芙蓉園
濕露迷城暗車轍芙蓉青根聯戚里美人對博逢山裏
潮痕欲上紅露晞知是日高梳洗起園南禁絕人行道
中有民間舊宿草廢園起岱鳴竊脂寒食始應通祭掃
答烟蘿隱者

月落烟霧動遙知夜不眠紫苔生水底白髮坐岩前野
鶴下窺影山人疑問年微啞度小劫勞贈遠遊篇

送人還蜀

白髮夢鄉國君歸路不迷狀槎秋見草荒棧夜聞雞月
過秦涼北星深河漢西何因到卻返吳語話分攜

哭所知

總戎臨百粵花鳥瘴江村落日失滄海寒風上薊門雨
青餘化血林黑見歸魂欲哭山陽笛隣人亦不存

鴻門讌

楊慎曰此詩雖李賀復生亦當心服李賀
集中亦有鴻門讌一篇不及此遠甚可謂

青出於

藍矣

天雲屬地汗流宇杯影龍蛇分漢楚楚人起舞本為楚

中有楚人為漢舞礪鞞淬光鳴不語楚國孤臣泣俘虜
他年疽背怒發此砭礪雲歸作風雨君看楚舞如楚何
楚舞未終聞楚歌

贈寫照唐子良

吳中衆史今代畫不獨畫人兼畫馬唐生家住金華雲
對子獨肯畫古人夕陽西下東流水紛紛古人呼不起
東都留守吳中豪王府勲僚舊俊髦當時氣薄陰山日
勾陳蒼蒼太白高百年水竭海塵上誰見凌烟拂蛛罔

霜髯磔磔開清新彷彿猶帶黃河水忽疑稍會怒色止
或可從傍窺諫紙唐生見我淚如洗頗憶古人今不死
俟我氣定神始閒命筆更起唐衣冠

種葵蒲萄下

茂葵花種蒲萄下年年葉長見花謝蒲萄漸密花漸遲
開時及見蒲萄垂微風搖曳架上枝陰雲凝碧行琉璃
天人下飲蒲萄露花神夜泣向天訴謝爾蒲萄數尺陰
不如寸草同此心

送袁大初歸剡原袁來抗宿傳法寺寺在惠壽宮
北今行路及園即宮舊址

大雷山下鄞江口石濕落星海涵斗莓苔瑣窗居鬼神
散髮天衣夜行酒百年綺語墮凡塵劉公不還謝公走
祇今零落三秋霜猶說先朝人物數道逢袁家美年少
欲挽吳潮歸兩袖自言學出戴君門又說舒君忘年友
舒君白頭爪塵垢戴君業成衣露肘君來何處覓知音
弔古淒涼無老叟出門擇語歸計餐顧忌慚皇無不有

不如歸食空江槎初生淡菜如珠母風帆送客來夷洲
白恰青衫談不朽君不見君今宿寺多鄞僧耆舊能言
幾人在隔牆食栢秋麝過廢石坡陀舊南內

九日前子善來會山中

朝尋寒露枝莫摘不盈把風吹西南雲幽情誰與寫有
客來縉州遺我古盞箏中有鴛鴦文色如銅雀瓦浮以
爵金甃蒼蘚藉其下此物寧足感聊用助歌者但懷郢
曲悲豈計所知寡

九日集葆寺得載字

貧居懶出門未到輒復悔偶尋秋夕英顧見石璀璨手
斲松根苓下有墳千載青山如葆羽無人禁樵採狂歌
呼麴生悲往興故在未卜遇浮丘猶堪居畏壘

二月十日

山居少四隣櫛葉半為新野色生遙念空江滯此身風
濤春憶越親舊晚游秦獨擬尋雞犬雲蘿挂葛巾

九日韶卿子善有約不至子靜亦歸桐廬與景雲

飲瀑下作

揉藍染釣緇欲老此江濱
九日寒泉水他年白髮身
隣州曾約客別業未歸人
嗅菊知吾事那能更問津

呈王尚書應麟

寒風吹鬢影客淚濕衣塵
千里見積水滿城無故人
船歌甌雪盡劒舞越花新
獨憶絲綸老相從話所親

山陰道中呈鄭樸翁

楊柳遠天色野風來水涯
異鄉同客夢今雨故人
家越

樹花啼鳥禹陵冬落花悠悠江海意為爾鬢先華

雨夜呈韶卿

相看隴水雲一夕幾回分預恐今宵雨他年獨自聞野
花同楚越江靄雜朝暉不得鋤芝朮逢樵却寄君

暮春感興

天涯芳草夢此意未應泯獨對風烟老虛為江海人漁
樵分落日櫻笋過殘春舉世無知己他年應逐臣

遊釣臺

古臺臨釣渚遺像在蒼烟有客隨槎到無僧依樹禪風
塵侵祭器樵獵避兵船應有前朝蹟看碑數漢年

西臺哭所思

殘年哭知己白日下荒臺淚落吳江水隨潮到海迴故
衣猶染碧后土不憐才耒老山中客唯應賦八哀

江上別友

相看仍慟哭欲學晉諸賢戍近風鳴柝江空雨送船荆
雲侵別色南雪憶歸年擬共鋤青禾無為俗事牽

夜宿江山寺

寺圖接異境僧影濕香烟落月安禪處翻經置縣年
天河當夏白泉水入杉懸到此懷甌越空家寄海邊

寺南小池

寺南疏小沼堤隱懶行踪杉影動寒水夕陽藏半峰
清涵落鳥毳寒怯病僧容聞說初開日鉢盂盛養龍

寄劉元益

他日憶逢君林中訪惠勤鹿麋行處見流水別時聞草

沒秦人家山通越國雲音書年歲失莫訝白鷗羣

己丑除夜

鬢絲殘雪影況復在塵埃暮色隨鐘盡年光逐水來
隣通燈下索鄉夢戍邊回明日聽春雨渡江登越臺

夜宿雪竇上方

雪竇師剡人住邊
支遁林賈山隱處

眠山枕斧柯獨客愛盤阿畏日生塵夢尋仙到鳥窠
下方聞夕磬南斗挂秋河寢服侵雲卷頰泉通瀑和竇分
滄海月禪入沃州歌此地精靈聚中宵弄薜蘿

絕句

楊慎曰此首雖太白見之亦當歛首

牽牛秋正中海白
夜疑曙野風入空巢
波濤在孤樹

楊慎

曰鼻羽律詩如夜氣浮秋井陰花冷碧田驛花殘楚水
烽火到交川山鬼下茅屋野雞啼苧蘿戍近風鳴柝江
空雨送船隣通燈下索鄉夢戍邊回柴闌當太白藥氣
近焦青暗光珠母陡秋影石花消下方聞夕磬南斗挂
秋河雖未足望開元天寶之蕭牆
而可以据長慶寶厯之上座矣

宋藝圃集卷十九